

**Date – 23/02/2026**

**Time - 7:30 -7:40 Hrs**

**AKASHVANI AIZAWL**  
**REGIONAL NEWS BULLETIN**  
**HEADLINES (MORNING)**

1. Vawiin chawhma dar 10 leh a chanve atangin Assembly budget session chu chhunzawm leh a ni ang.
2. Larsap General VK Singh-a'n Mizoram chu hmarchhak biala khualzin pun chak berna state a nih thu a sawi.
3. Prime Minister Narendra Modia chuan India chuan Israel leh India inthianthatna chu a ngaihlu tih a sawi.
4. India chuan Aghanistan ramchung Pakistan thlawhnaten an kap chu a dem thu a sawi.

<><><>

**ASSEMBLY SESSION**

Vawiin chawhma dar 10 leh a chanve atangin Assembly budget session chu chhunzawm leh a ni ang.

Vawiin Assembly inkhawmah hian zawhna leh chhanna hun hman a ni ang a. Zawhna leh chhanna hun a tawp hnu-ah Chief Minister Pu Lalduhoma'n Mizoram Information Commission Report 19-na chu House dawhkanah a dah ang a. Dr. Vanlalhlana'n Mizoram Goods & Services Tax (GST) Tax Act hnuai a hriattirna chhuah pahnih chu House dawhkanah a dah bawk ang. Pu Jeje Lalpekhlua'n Committee on Petitions report 3-na Higher and Technical Education Department chungchang chu House-ah a pharh ang.

He mi hnu hian Pu Lalduhoma chuan Sialkal Range Development Council Bill, 2026 chu Assembly ngaihtuah turin a chhawp chhuak ang a, sawiho a pawm tum a ni ang. Pu Lalnghinglova Hmar chuan The Mizoram Shops & Establishments (Regulation of Employment and Conditiona of Service) Amendment Bill, 2026 chu House a ngaihtuah turin a chhawp chhuak ang a, sawiho a pawm nghal tum a ni ang.

Tun tum Assembly inkhawm kal lai-ah hian sorkarin dan siam tur a ruahman 7 a lut tawh a. Bill 2 chu dan thar siam tur a ni a, 5 chu dan awmsa siam thatna tur a ni thung a. Dan siam thar tur 1 leh dan siamthatna tur chu Assembly-a sawiho a nih hnu-ah pawm a ni tawh a. Tuna dan siam thatna lut tur zingah hian Tourism department thehluh dan siamthatna tura rawtna leh Mizoram State University dan siamthatna tur bill a lut tawh bawk a ni.

<><><>

## GAS PIPELINE

Tripura atanga Mizoram khawpui Aizawl-a Natural Gas Pipeline phumna atan Central Sorkar chuan cheng vbc 491 a ruahman.

He thu hi Assembly thutkhawm kal mekah Food Civil Supplies & Consumer Affairs Minister Pu B. Lalchhanzova chuan a tarlang a. Ziaka zawhna a chhannaah Minister chuan sorkar laipui chuan gas pipeline phum na'na a ruahman cheng vbc sang 9,265 a ruahman atangin Tripura khaw pakhat Panisagar atanga Aizawl inkara Natural Gas Pipeline phumna atan a cheng vbc 491 ruahman a ti a. Hetihlai hian khawpui chhunga semdarhna atan hian pipe phum hna tan a la nih loh thu sawiin, Tripura Natural Gas Company Ltd-te'n hnathawhna hmun tur an mamawh ang an neih fel phawt loh chuan hna a la tan theih loh thu a tarlang a ni.

<><><>

## TOURIST FOOTFALL

Larsap General VK Singh-a'n Mizoram chu hmarchhak biala khualzin pun chak berna state a nih thu a sawi.

Thawhlehnia Assembly Budget Session hawna inkhawma thu a sawihna-ah Larsap chuan kum 2025 April thla atanga December thla inkarah khan India ram chhung leh tualchhung zinmi nuai 6, sing 7, sang 9 leh 607 leh ram dang atangin mi 9,606 te'n Mizoram an rawn tlawh a, sorkar kum liamta ai khan khualzin zat chu za a 29.50 in a khum a ti. December thla chu khualzin tam ber tum niin, mi nuai 1, sing 3, sang 3 leh 520 in Mizoram an rawn tlawh a, kum hmasa December thla nen khaikhinin za zela 122.11 a pung a ti a. Mizoram chu hmarchhak biala khualzin pun chak berna state a nih mek thu sawiin, Sairang a rel rawn luh hnuah phei chuan Mizoram chu hmarchhak biala khualzinte tlawh hlawh mek a ni chho mek a ni a ti.

Byte: Governor

Prime Minister Pu Narendra Modi pawhin Chief Minister Pu Lalduhoma Mizoram State Day chibai a bukna-ah, Mizoram tlawhtu pung chho mek chu lawmawm a tih thu sawiin, hei hian sum lakluh kawngah leh sum leh pai dinhmunah hmasawna a thlentir a ti a. Mizoram mipuite ngainatawmna leh mikhual laka thatna chuan khualzin tam zawk a hip ngei a rin thu a tarlang bawk a ni.

Mizoram Tourism Department-in an chhinchhiah danin, kum liamta 2025 chhung khan Mizoramah zinmi nuai 8, sing 4, sang 1, 322 an lo lut a, chung zinga zaa 97.45, mi nuai 8, sing 1, sang 9, 838 te chu India state hrang hrang amite an ni a, midang sing 1, sang 1, 479 te chu ram dang mite an ni thung a, ram dang atanga Mizorama lo zin lut zingah Myanmar khua leh tui tam berin za zela 69.2, mi 7,945 an rawn zin a, USA-in dawtin mi 1, 091 an rawn zin a ni.

Nikum chhunga zinmite'n Mizoram an tawn tlawh tam ber thla December chhung khan mi nuai 1, sing 3, sang 3, 520 an rawn zin a. Chu'ng zinga nuai 1, sing 3, sang 2, 375 chu India mite niin, midang 1,145 te chu ramdang mi an ni thung a ni.

<><><>

## ASSEMBLY-MUHCS

Mizoram sorkar chuan tun thla February ni 3 thleng khan MUHCS hnuai Non Empanelled Hospital a damlo refer-te Bill cheng vbc 25, nuai 11, sing 5, sang 2, leh 17 a ba.

Health Minister Pi Lalrinpui chuan Assembly thutkhawmah ziaka zawhna chhangin kumin February ni 3 thleng khan Mizoram sorkar chuan MUHCS hnuai Non Empanelled Hospital a damlo refer- mi sang 2, 837 te Bill cheng vbc 25, nuai 11, sing 5, sang 2, leh 17 a ba tih a sawi a, Mizorama private damdawi in zinga MUHCS empanelled la ni lo te inrem tumin an inbe mek tih a tarlang a.

Tun dinhmunah Mizoram chhunga mimal enkawl Damdawi in 16 - JC Eye Hospital, Aizawl, Nazareth Hospital, Chaltlang, Aizawl, Nazareth Hospital, Ramhlun North, Aizawl, Redeem Hospital, College Veng, Aizawl, Synod Hospital, Durtlang, Aizawl, BN Hospital & Research Centre, Kulikawn, Aizawl, Eye Care Hospital, Dawrpui, Aizawl, Champhai D.M. Hospital, Champhai, MED-AIM Hospital, Champhai, Christian Hospital, Lawngtlai, Lawngtlai Lairam Christian Medical Centre (LCMC), Lawngtlai, Christian Hospital, Serkawn, Lunglei, Faith Hospital, Lunglei, John Williams Hospital, Lunglei, Serchhip Mercy Hospital, Serchhip leh Maraland Gospel Centenary Hospital (MGC), Siaha te bakah Day Care Centre pathum- Kidney 360° Superspeciality Clinic and Dialysis Centre, Bazar Bungkawn, Aizawl, Rapha Day Care Centre, Zarkawt, Aizawl leh Vohbik Day Care, Salem Veng, Aizawl te an ni.

Mizoram pawna private hospital 33 awm bawkin chungte chu Silchar, West Bengal khawpui pakhat Barasat, Ghaziabad, Mumbai, Gurugram, Lucknow, Ranchi, Indore, leh Patna-ah te damdawi in pakhat theuh, Noida-ah damdawi in 2, Guwahati-ah damdawi in 4, New Delhi-ah damdawi in 8 leh Kolkata-ah damdawi in 10 te an ni.

<><><>

## ASSEMBLY-GARBAGE

Aizawl bawlhhlawh khawwna leh paihna atan AMC leh Local Council chuan kum 2024 -2025-ah cheng vbc 8, nuai 40, sing 6, sang 2 leh 937 leh kum 2025 atanga kumin 2026 January ni 30 inkarah cheng vbc 7, nuai 35, sing 4, leh 982 an seng.

He thu hi Urban Development and Poverty Alleviation Minister Pu K. Sapdanga chuan ziaka zawhna a chhanna-ah sawiin, tun thlenga bawlhhlawh paihna hmun tha leh dik, duh ang Mizoramin a la neih loh chhan chu tlang rama awm a nih angin bawlhhlawh sawngbawlna tur hmun zawl leh rualrem tha a vanga, a awm chhun pawh vantlang ram ruak emaw, Sorkar ram te a nih thin loh avangin bawlhhlawh paihna atan a remchang thin lo a ti a. Hei bakah hian sum harsatna avang pawhin bawlhhlawh sawngbawlna hmun tha leh dik neih a harsa bawk a ti.

Minister chuan khawvel hmasawn zel milin bawlhhlawh paihna leh sawngbawlna te chu tha leh changkang zawk a tih changtlun tumin hma an lak mek tih sawiin, kum 2025 April ni 1 atang khan Damdawiin leh clinic-te bawlhhlawh bik (Biomedical waste) sawngbawlna changtlung tak (Common Bio-medical Waste Treatment Facility) hman tan a ni a. Hetiang bawlhhlawh hi nitin kg 1,400 vel sawngbawl thin a ni tih sawiin, Lunglei ah siam a ni leh thuai dawn a ti a. Aizawl-ah hian Construction & Demolition Waste Treatment Center sak mek a ni thu sawiin,

Tuirial-a Solid Waste Management Centre-ah bawlhhlawh tawih thei sawngbawl na changlung tak, ni khat a metric ton 50 sawngbawl thei hman mek a ni tih a sawi bawk.

Minister chuan kumin July thla atanga hman tan theih turin bawlhhlawh tawihthei lo ni khata metric ton 75 sawngbawl thei “75 TPD Material Recovery Facility” chu IGC, Luangmual ah siam mek a nih thu leh Mizoram khawpui (District hmunpui leh khaw lian deuh) zawng zawngah Solid Waste Management Centre din vek tumin hna an thawh mek thu a sawi bawk a ni.

<><><>

#### **AIR NEWS ON SOCIAL MEDIA**

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

#### **ASSEMBLY-FISH**

Kum 2020 atanga 2025 inkar chhung khan Mizoramin sangha ton sing 2, sang 7, 114 point 76 a thar chhuak.

Assembly Budget Session kal mek a Aizawl West 3 bialtu Pu VL Zaithanzama zawhna ziaak a chhangin, Fisheries Department changtu Minister Pu Lalthansanga chuan kum 2020-21 khan Mizoramah sangha tonne 4,504 point 31 thar chhuah a ni a ti a. Kum 2021-22 khan tonne 4,757 point 55 thar chhuah niin, kum 2022-23 khan tonne 5,229 point 85 thar chhuah a ni a. Kum 2023-24 -ah tonne 5,470 chuang leh kum 2024-25 -ah tonne 7,152 point 16 thar chhuah nia chhut a nih thu a tarlang a. Kum 2020 atanga 2025 inkara Mizoramin sangha a thar chhuah zat belh khawm hi tonne sing 2, sang 7, 114 point 76 a tling a ni.

Hei bakah hian Minister chuan Fisheries Department-in Mizoram luhka-ahte chhinchhiaha hmun a neih loh avangin Mizoram pawn atanga sangha rawn lut zat hi chhinchhiaha a nih loh thu a tarlang bawk a ni.

<><><>

#### **PM**

Prime Minister Narendra Modia chuan India chuan Israel leh India inthianthatna chu a ngaihlu tih sawiin an inzawmna chu inrintawmna, ngaihtauhna thar leh remna leh hmasawmna siam tura an hmalaknaah a inngat a ni a ti. Israel PM Benjamin Netanyahu-a social media post a chhanletnaah he thu hi sawiin Pu Modia chuan India leh Israel ten inzawmna nghet tak an neih chu a pawmpui thu sawiin hei bakah hian ram pahnihten thawhdunna hrang hrang an neih zel a duh thu a sawi a. Israel a tlawh hunah hruaitu pahnihten inbiakna tha tak an neih theih a beisei thu a sawi a ni.

<><><>

#### **INDIA CONDEMN PAK AIRSTRIKE**

India chuan Aghanistan ramchhung Pakistan thlawhnaten an kap chu a dem thu a sawi. External Affairs Ministry thupuangtu Randhir Jaiswal chuan hemi chungchanga chanchinbumite zawhna chhangin Pakistan-in a tualchhung buaina rampawna benper a tumna pakhat anih thu a sawi a. Muslim te thlaserh Ramadan

laia hetiang a sipai thlawhna hmanga Afghan ramchhung an bei chu a demawm a tih thu sawiin civil mi engemawzatin hliam an tuar a ti a. An zingah hian hmeichhia leh naupang an tel a ti a. India chuan Afghanistan-in mahnia ro inrel tura zalenna a neih chu a thlawp tlat tih a sawi baw k a ni.

<><><>

## **AI IMPACT SUMMIT**

Prime Minister Narendra Modi-a'n India AI Impact Summit chu hmalam huna khawvelin AI thiltihtheihna a chhawr tangkai dan tur tarlanna a ni, a ti. Nimina Akashvani-a Mann Ki Baat hun a hmanna-ah he thu hi sawiin ram hrang hrang hruaitute, industry lam hotu pawimawhte, thil siam chhuak mite leh Start-Up sector kalpuitute, AI Impact Summit-a tel tur hian New Delhi-a Bharat Mandapam-ah an rawn fuan khawm a ni, a ti a, AI lama India-in theihna sang tak a neih zia, khawvelin a hmuh phah tih sawiin Summit neih hun chung hian India-in Made in India AI Model pathum a tlangzarh a ti baw k.

<><><>